

Xcarta San Pablo Huantu

Catzóknih Galatas

Umá carta huantu San Pablo catzóknih cristianos huanti xtalipa-huán Cristo nac Galacia, xtachuná huamputún amá mactumlítum xcarta huantu xlá ticatzóknih amakolh xtacanajlanín huanti xtahuilánalh nac Roma, porque lacatancs lichuhuinama pi laquí nakalhiyáhu laktáxtut xlacasquinca nalipahuanáhu Cristo, y ni caj xpamacata para túcuya tlán tascújut natlahuay chatum cristiano. Pero pulauctutu huí huantu juerza tzinú litalakpálit. Xlipulactum huantu lacatancs huan pi ni matlantiy xlacata huanti talipahuán Cristo natakaxmata atúnuj evangelio o tachu-huín huantu huancán pi na nacamaxquiý xlaktáxtut xlistacnicán, pero huantu lakmakán o lactlahuaputún amá laktáxtut huantu mastay Jesucristo. Xlipulactiy, San Pablo tlihueklh tayay tancs maluloka pi xlicana xlá kalhiy amá limateksín porque Dios man lacsacnít laquí nalitaxtuy xapóstol Jesucristo, chuná chuhuinán nac xlacatincán amakolh cristianos huantu caj taaksanjinán y talitaxtuputún cumu la lacuán apóstoles. Y xlipulactutu o xlíahuatá, xlá lichuhuinán pi aquinín nilay para túcu natlahuayáhu huantu tlán nalilakmáxtuyáhu quilitacnicán nac xlacatín Dios, huata huá likalhiyáhu laktáxtut caj xpamacata cumu lipahuanáhu Cristo y canajlayáhu pi acxní xlá nilh nac cruz antá xokónulh quimpalacatacán laquí chí aquinín niaj tū lacleniyáhu Dios. Cristo na quincalakmáxtún xlacata niaj chunatiyá xliankalhín naquincalilayán amá xamakán xlimapeksín Moisés cumu la xtachín chuná cumu la xcalilayá judíos. San Pablo calimakalh-chuhuiyi amakolh cristianos huanti talipahuán Cristo pi huantu akstítum catalilatámálh amá laktáxtut huantu camáxquicanit, y camininiy acxtum calapáxquilh chatunu chatunu y calalíscujli.

1 Aquit Pablo apóstol, ni xlacata para huá lacchixcuhuín chuná quintalilacsacnít y quintalimáxtunít apóstol sinoque huá quilacsacnít Quimpuchinacán Jesucristo xahua Quintlaćicán Dios huanti mala-

castacuaninít nac caļinín.² Luu cāna lipaxúhu ccatzoknimán umá quincarta huixinín huanti lipahuanátit Quimpuchinacán Jesucristo y lapátit nac xapulatamán Galacia, y na caxakatlilacamachán

xlihuāk natalanín huānti lacxtum quintatalamánalh uú. ³ Quintlaticán Dios xahua Quimpuchinacán Jesucristo cacasiculanatlahuán y cacamaxquín tlān latámāt. ⁴ Jesucristo tamacamástalh nac calinín caj quimpalacatacán laquí chuná tlān naquinçalakmáxtuyán lata xlilhuhua huāntu ntlán anán nac caquilhtamacú porque huá chuná laclhcahuilnít Quintlaticán Dios. ⁵ ¡Canexnicahuá calakachixcuhiúcalh Dios! Chuná calalh, amén.

Pablo lipuhuán pi xlacán pálá talakmakamputún xtachuhuín Cristo laquí tunu huāntu natalipahuán

⁶ Aquit luu caj cacs clilacahuán lata huixinín luu pálá lakkamputunátit amá xtachuhuín Cristo huāntu mastay laktáxtut huāntu caj xpalacata xtalakalhamanín Dios ticalimákalhchuhuínán laquí nalipahuánátit, pero huata lipahuampátit amá túnuj tachuhuín huāntu cahuanicanátit pi nacalakmáxtuyán. ⁷ Masqui xlicána tancs ccahuaniyán pi niú túnuj xasasti tachuhuín huāntu nacalakmáxtuniyán milistacnicán, caj xman talamánalh makapitzín aksaninanín cristianos huānti akatiyuj çatlahuayán porque cahuanianyán pi nichuná lapátit osu ni chuná canajlayátit cumu la lacasquín Dios; pero xlacán caj calimákalhchuínputunán atúnuj tachuhuín huāntu tahuán pi huá mastay laktáxtut y ni talakatiy amá xlaktáxtut milistacnicán huāntu camaxquiyán Cristo. ⁸ Pero para tícu xcaliakchuhuínanín túnuj tachuhuín huāntu nacalakmáxtuniyán milistacnicán níxachuná

cumu la amá lipaxúhu tachuhuín huāntu aquit aya ccálimákalhchuhuínítán, tancs cuan pi maktum calaktzankatáyalh, ni quincuenta para aquit osuchí para chatum ángel xalac akapún. ⁹ Masqui xapulh aquit aya tancs ccahuaniyán, lanchú ccahuaniparayán pi para tícu caliakchuhuínaniyán túnuj tachuhuín huāntu nacalakmáxtuyán nichuná cumu la huāntu aquit ccálimákalhchuhuínítán, maktum pi calaktzankatáyalh.

¹⁰ Masqui ni xlakatítit xmanhuá huāntu xtalulóktat naccáhuaniyán, porque aquit ni huá cputzama xlacata para talipahuua naquintalimáxtuy cristianos, huata huá aquit claktzaksama xlacata pi huá Dios talipahu naquiliimaxtuy. Porque para aquit caj xman huá xaclapútza lata lácu naquintalipahuán cristianos entonces niaj xapóstol Cristo xaclitáxtulh.

Pablo lichuhuínán lata lácu apóstol litáxtulh

¹¹ Natalán, aquit clacasquín nacatziyátit pi umá xasasti tamacatzinín huāntu mastay laktáxtut huāntu aquit cliakchuhuínama, ni huá xtalacapastacnicán cristianos. ¹² Porque aquit ni caj chatum chixcú quimasiyuninit o quilimákalhtahuakenit, sinoque mismo Jesucristo man quimacatziníkonit xtalacapastacni.

¹³ Huixinín máx aya makkaxpatnitátit lata lichuhuínancán lata lácu aquit xaclicatzij acxní xacmakapeksiy y xacmamákantaxtiy xlihuāk huāntu tatlahuay judíos; aquit xlicána pi lipecua xaccasi-

tziniy y xaccaputzastalay xlíhuák huánti talipahuán Jesús laquí nac camájakspuy. ¹⁴ Acxní aquit na xacmákantaxtiy amá límapeksín huántu tastañaniy judíos, lata xlíhuák huánti lacxtum xaccatástacnít aquit atzinú xaclarputzay lata lácu luu líhuana nacmákantaxtiy amá límapeksín huántu xtalipahuán qui lítalakapasnicán. ¹⁵ Pero hasta acxní aquit niña xaclarachín nac caquill tamacú Dios quilácsacli pi xtasacua naclítaxtuy, y acxní lákchálh quilhtamacú caj lata xtalakalhamanín xlá quintasánih ¹⁶ acxní quilimá lacahuánih xkahuasa Jesús nac xatiji Damasco laquí aquit acalistán nacliakchuhuinán amá lipaxúhu xtachuhuín huántu mastay laktáxtut nac xlakstipancán huánti ni judíos. Pero niña xaclarama para tícu naquilimókalchuhuiniy huántu nacuán, ¹⁷ na nipara calh nac Jerusalén xlacata naccatachuhuinán huánti aya xapulh apóstoles xta huanít, huata aquit tuncán calh nac xapulataman Arabia, y acxní cqui tásptli antá cchimpá nac Damasco.

¹⁸ Hasta xliaktutu cäta acu calh nac Jerusalén laquí naclakapasa apóstol Pedro y aktiy xamána antá lacxtum xactalamachá. ¹⁹ Pero acxní antá xaclarachá ni ccaucxilhli xamakapitzín apóstoles caj xmánuá cúc xilhli Santiago huánti xlítalakapasni Quimpuchinacán. ²⁰ Aquit tlán ccámáluokniyán nac xlacatán Dios pi umá huántu aquit ccatzoknumán huá xtalulóktat.

²¹ Acalistán acxní ctácxli nac Jerusalén calh latapuliy nac xapulataman Siria y Cilicia. ²² Por eso amá quilhtamacú nac Judea ninajtí

xquintalakapasa natalán huanti xtalipahuán Jesús huanti xtahuilánalh nac amá pulataman. ²³ Caj xman xtakaxmata lata xquili chuhui nancán: “Amá chixcú huanti xapulh xquincaputzastalayán xlacata naquincatamacnuyán nac pulachin, lanchú xlá na aya liakchuhuinama umá xasasti tamacatzinín huántu xlá xmájaksputuputún.” ²⁴ Y huák xtalakachixcuhiy Dios caj xplacata huántu xlá tlahanít nac quilitámat.

Xamakapitzín apóstoles tlán tatlahuay Pablo cumu la apóstol

2 Hasta xliakcutati cata acu ctiampá nac Jerusalén pero lacxtum ccataálh Bernabé xahua Tito. ² Aquit juerza cquílalh porque huá Dios xquimacatzininit pi xla casquín pi aquit nacán; y acxní chú aya antiyá xacuilenancháhu nac Jerusalén túnuj ccataamacxtumíhu amákolh apóstoles huanti luu lacaxtum xcalakapascán pi huá xtalacscujnimánlh Cristo y ctzúculh calítakalchuhuinán lácu aquit ccalimákalchuhuiniy huánti ni judíos amá laktáxtut huántu mastay Cristo. Huá chuná clítláhualh porque aquit ni clac asquín caj chunatá nalaclatamay amá quintascújut huántu ctiliscujmajcú lanchú. ³ Xlacán tamatlántih huántu cmásiyuy, y masqui xata catziy pi ni judío amá quiamigo Tito huanti aquit xactaánit, nitícu huá para xafuerza nacircundarlay laquí tlán nacatatapeksiy. ⁴ Cpuhuán pi niña xtilihuánih catacircuncidárlalh para ni antá cahuá xcatatalakxtuminit amákolh

natalán makapitzín aksaninanín huantí talitanuy pi na talipahuán Cristo, tzek xquincapektanunitán laqui naquincaskalaján para xlíçana aquinín huak cmäkantaxtiyáhu huantú limateksínán xlimateksín Moisés, y laqui xafuerza nacmäkantaxtiyáhu y chuná xtachín limateksín naclitaxtuparayáhu.

⁵ Pero masqui ankaliñá xquinca skalajmacán, aquinín nipara maktum ccämamaxanáihu o chämamaxanaj nacllahuayáhu huantú xlacán talacasquín, porque aquinín elacasquináhu pi amá laktáxtut huantú mastay xtachuhuín Jesús canecxni cahuá nakalhiyátit.

⁶ Amäkolh apóstoles huantí xtapuxcuniy cristianos huantí talipahuán Cristo ni quintahuánilh para nítlán huantú aquit ccalimäkalchuhuiniy amäkolh cristianos huantí ni judíos, masqui xlíçana pi aquit ni quincuenta para tamäkolh apóstoles luu lac-taliphua talitaxtuy, porque Dios acxtum calakalhamán xcamanán y camaktayay. ⁷ Huata xlacán niitu taliaklhuhuátnalh tuncán taakátäksli pi xlíçana huá Dios quililacsacnít laqui naccämäkalchuhuiniy amäkolh cristianos huantí ni judíos lata lácu tlán natalak-mäxtuy xlistacnicán, chuná cumu la Pedro lìlacsacnít nacämäkalchuhuiniy huantí judíos. ⁸ Porque chatumá amá Dios huantí Pedro malakáchalh limateksil apóstol laqui nacämäkalchuhuiniy huantí judíos, na huatiyá amá Dios huantí aquit quimalakáchalh y quilimäxtulh apóstol laqui naccämäkalchuhuiniy huantí ni judíos.

⁹ Amäkolh huantí luu tlak lac-talipahu xcalimäxtucán huantí xtapuxcuniy cristianos, Pedro, Santiago y Juan, nitú akatiyuj tálalh, huata tacanájlalh pi xlíçana huá Dios xquimaxquiñit eé tascújut. Y lata tamatlátilh pi aquinín chunatiyá nacscujáhu la cscujmanáhu, lipaxúhu quincamacatiyán aquit xahua Bernabé cumu la liamigos, y quincamaxquiñ quilhtamacú pi cacamparáhu cämäkalchuhuiniyáhu amäkolh cristianos huantí ni judíos, y xlacán antiyá natamäkalchuhuiniy xlíhuak huantí judíos.

¹⁰ Caj xmänhuá quincähuanán pi aquinín ankaliñá caccäakli-huáhu amäkolh laklimäxkenén huantí tahuilánalh nac Jerusalén, y súluj caetlahuáhu acatzunán tumín huantú tlán naccälímaktaayayáhu, masqui xlíçana pi huantú xlacán quintahuánilh aquit ankaliñá chuná ctluama.

Pablo lacaquilniy Pedro nac Antioquía

¹¹ Pero acxní amá quilhtamacú Pedro quílalh nac xacachiquín Antioquía, nac xlacatincán cristianos clilacaquílnih caj xpälacata huantú nítlán xtluama. ¹² Porque xapulh huá lacxtum xcatahuayán huantí ni judíos pero talipahuán Cristo, hasta acxní tachilh nac Antioquía makapitzín cristianos huantí xcapuxculéma Santiago; acxní tuncán tzúcuh tapajpitziy y niaj lacxtum xcatahuayán huantí ni judíos, porque xçälacapuhuaniy amäkolh cristianos chicá para lácu natalacpuhuán natalitaaklhuhuiy cumu xlacán hasta ni caticatihuá-

yalh huantí ni tacircuncidarlanít. ¹³Y xlíhuak xamakapitzín judíos xalac Antioquía huantí xtalipahuán Cristo, nachuná tzúculh tatapaj-pitziy niaj lacxtum xtatahuayán cumu la Pedro, y hasta Bernabé na aya chuná xtamakacanajlanít natlahuay. ¹⁴Pus acxní aquit cúc-xihli pí nichuná xtalamánlh cumu la xlacán xtacatzíy pi ni lacasquín Cristo, ni cmatlántílh y nac xla-catincán xlíhuak cristianos chiné cuánihl Pedro: “Huix judío pero niaj chuná lápat cumu la xlilatamatcán, huata lápat cumu latí ni judíos, étúcu chinchú xpälacata calilacasquiniya amakolh cristianos huantí ni judíos xlacata chuná catalámalh cumu la chatum judío?”

Xlíhuak cristianos mäsqui ni judíos para talipahuán Cristo natalkaxtuy

¹⁵Xlicana pi huix Pedro y aquit judíos hasta lata tilacachíhu y huá xpälacata ni quincalimäpacuhuicán “maklakalhinanín” cumu la judíos talimäpacuhuiy xlíhuak huantí ni judíos porque xlacán ni tamakan-taxtiniyt xlimapeksín Moisés. ¹⁶Pero mäsqui chuná stalanca catziyáhu pi nipara chatum cristiano catilakmáxtulh xlistacni caj xpälacata cumu líhuaná namakantaxtiy huantí limapeksinán xlimapeksín Moisés, sinoque xmanhuá nalaktaxtuy huantí nalipahuán Jesús. Huá xpälacata aquinín acxtum judíos cumu la huantí ni judíos lipahuanitáhu Quimpuchinacán Jesucristo laquí caj xpälacata amá quintacanajlatcán huantí kalhini-yáhu naquincalacxacaniyán xlíhuak quintalakalhincán; pero nipara

chatum lacxacanicán xtalakalhín caj cumu líhuaná mäkantáxtílh huantí huan nac límapeksín.

¹⁷Pus para acxní aquinín huantí judíos niaj lipahuanáhu xlimapeksincán judíos y huata huá chú lipahuanáhu Cristo laquí naquincalacxacaniyán xlíhuak quintalakalhincán, qui-taxtuy pi xamakapitzín judíos quincalimäxtuyán lanca maklakalhinanín, éntonces eé huamputún pi huá Cristo maklakalhinanín quincatlahuayán? ¡Oh, xlícaná xlá pi nichuná! ¹⁸Porque caj calacapástacti, para huix man malacatzuquiparaya huantí xlak-makanita, entonces huata huix mëcstu putzápat laci maklakalhinaná nalimäxtucana. ¹⁹Porque xapulh aquit juerza cacmäkantáxtílh xlimapeksín Moisés xaclacpuhuán, pero chalh quilhtamacú acxní antiyá nac límapeksín cqijakátaksli pi nilay líhuaná cmäkantaxtiy y man amá límapeksín quimáknih. Pero tlän quinquitaxtúnih pi cnínilh amá límapeksín laquí maktum nac-tzucuy lìlatamay cumu la lacasquín Dios. Aquit lacxtum quintapecex-tokohuacacanit Cristo nac cruz, ²⁰y lanchú mäsqui clama niaj clilama cumu la ti tapeksiniy xlatámat, huata huá tapeksiniy Cristo huantí lama nac quinacú; y amá akstítm quilitámat huantí clilama chuná tlän akstítm clilama caj xpälacata porque clipahuán Xkuhuala Dios y ccatziy pi snun quilakalhamanit hasta límacamástahl xlatámat caj quimpalacata. ²¹Aquit ni cactilak-mákalh umá xtalakalhamanín Dios, porque para tícu lacpuhuán pi tlän

nalakmäxtuy xlatámat caj cumu huá namäkantaxtiy huántu huan xlimapeksín Moisés, para chuná entonces quitaxtuy pi niitu lima-cuán masqui quincaquipälacanichín Cristo.

Dios quincälakmäxtuyán caj xpälacata cumu lipahuanáhu

3 Koxutanín huixinín lactonto cristianos xalac Galacia, éticu cascuhuán xlacata niaj akstítum nalipahuanátit Cristo? Porque lata maklit aquit ccamäkalchuhuinín lacatancs ccáhuanín pi Cristo pekextokohuacácalh nac cruz caj quimpalacatacán.² Pero clacasquín naquiläkalhtiyáhu umá takalhasquinín huántu camán catlahuaniyán: ¿Dios camacaminín y camaxquín Espíritu Santo caj xpälacata cumu mäkantaxtítit huántu limateksinán xlimapeksín Moisés o porque lipahuántit Quimpuchinacán Jesús huánti cali-tachuhuinancántit?³ iXlicana pi luu lanca calakayacántit! Dios calakalhamán y camaxquín xEspíritu Santo laqui tlän naakataksátit huántu nalilaktaxtuyátit, pero huata chú huamparayátit pi huá milimäkantaxtítcán huántu caj xlimapeksincán judíos, entonces quitaxtuy pi lakapuxtu pim-pátit.⁴ Xlihuák huántu huixinín aya xlakapasnítátit xaclacpuhuán pi nacamktayalenán, ipero lám-para niitu cälimacuanín!⁵ Acxní Dios camaxquín xespíritu y cat-láhuálh laclanca licácnit tascújut nac milakstipancán, élácu cahuá chuná lítláhuálh? Porque makapi-tzín huixinín huá xlaktzaksapátit

xlimapeksín Moisés, xlicana pi ni huá lítláhuálh, sino porque lipahuántit xtachuhuín Jesús huántu aya kaxpatnítatit.

⁶Chuná cumu lą xamakán quiltamacú Abraham cänajlánihl xlihuák huántu Dios malacnúnihl poreso Dios matzankenánihl xlihuák xtaläkalhín y limatestulh cumu lą xalaktaxtun cristiano huánti niaj kalhiy xtaläkalhín.⁷ Huá xpälacata ccálihuaniyán para huixinín macastälaputunátit amá xamakán Abraham y nalitaxtuputunátit cumu lą xaxlicana xlijatalakapasni, entonces cämininiyán nalipahuanátit huántu Dios malacnunit chuná cumu lą Abraham lipáhuálh.⁸ Porque hasta lata xamakán quiltamacú Dios xucxilhacachima lą nacälakalhamán cristianos cälacchú quilhtamacú, y chiné tatzoktahui-lanit nac likalhtahuaka pi Dios ná nacälakmäxtuy xlihuák amakolh cristianos huánti nalipahuán huántu Dios namälacnuy xtachuná cumu lą lakalhámahl Abraham caj xpälacata xtacanájlat porque chiné timälacnúnihl: “Xtachuná cumu lą clakalhamanítán caj xpälacata cumu quilipahuana, nachuná naccälakalhamán xlihuák cris-tianos huánti tahuilánalh nahuán masqui canihuá pulataman.”⁹ Pus xlihuák huánti lanchú talipahuán huántu malacnuy xlicana pi Dios ná nalakalhamán cumu lą tilakalhámahl Abraham caj xpälacata cumu tilipáhuálh.

¹⁰ Xlihuák huánti caj xmänuá talipahuán pi tlän natalilaktaxtuy para natamäkantaxtiy huántu huan nac xlimapeksín Moisés, nac likalh-

tahuaka chiné tatzoknít xpálaceata: “Paxcatacu tihuán amá chixcú huantí ni líhuana namakantaxtiy xlíhuak huantú límapeksinán xlímapeksín Moisés.”¹¹ Pus luu lacatancs talu-loka pi ni para chátum cristiano catilakmáxtulh xlístacni caj cumu namakantaxtiy xlímapeksín Moisés, porque nac líkalhtahuaka chiné huán: “Amá huantí tlán cristiano lítaxtuputún xmánuá nalak-máxtuy xlatámat nac xlacatín Dios para nalipáhuán huantú málacnuy.”¹² Pero amá xlímapeksín Moisés, ni caj xmáñ nacanajlaya huantú límapeksinán laquí nalakmáxtuya milatámat nac xlacatín Dios, sinoque chiné huan: “Xmanhuá amá cristiano huantí akstítum namakantaxtíkoy xlíhuak huantú límapeksinán límapeksín huantí nalakmáxtuy xlatámat nac xlacatín Dios.”

¹³Cristo quincalakmáxtún lata xamanáhu laktzankayáhu porque aquinín nilay líhuana xmákan-taxtiyáhu huantú límapeksinán xlímapeksín Moisés, y hasta lítáxtulh cumu la chátum xalak-tzankán maklakalhiná acxní niñ caj quimpalacatacán, porque nac líkalhtahuaka chiné huan: “Xlíhuak amá huantí pekextokohuacacán nac kantum quihui mininiy napatiún laquí naxokonún xlíhuak huantú tlahuanit lixcájnit xtalakalhín.”¹⁴ Xlicana pi Dios tlán tláhuahil pi huá Cristo naxokonuny quimpalacatacán laquí acxtum naquincalakalhamanán chuná la aquinín judíos cumu latí ni judíos, tlán nacalakalhamanán Dios chuná cumu la timálacnunichá Abraham,

y lata lipáhuanátit Jesús na tlán makamaklhtinanátit Espíritu Santo.

Xlímapeksín Moisés nilay xlactlahuay huantú xmálacnunitá Dios

¹⁵Natalán, acxní chátum chixcú para túcu lítalacaxlay tunu xtá-cristiano o para túcu málacnuniy, litayaniy namaxqui y nafirmartla-huaniy mactum cápsnat, xlicana pi ni para chátum tícu catilactláhuahil o ni para chátum tícu catimáli-huáquihil. Para aquinín cristianos mákantaxtiyáhu huantú litayayáhu y firmar tlahuayáhu xalíhuaca Dios namakantaxtiy huantú málacnuy.

¹⁶Pus Dios huí tū timálacnúnilh Abraham xamakán quilhtamacú acxní tihuánihil pi nacasicula-natalahuay xlítalakapasni huantí natalacachín acalistán. Pero Dios ni huánihil “xlíhuak militalakapasni”, cumu la a cacalichuhuinanchá xlíhuak cristianos, sinoque caj xmánuá chátum y amá chixcú huá Cristo.¹⁷ Aquit clacasquín pi huixinín xakatákstít pi Dios tatlá-huahil Abraham aktum tamálacnún y malúlokli, y mäsqui xliaktatítá ciénto apuxamacáhu cajac acalistán milh xlímapeksín Moisés, huantú huan amá límapeksín nilay lac-tlahuay huantú xmálacnunit Dios.

¹⁸Porque caj calacpuhuántit: para amá huantú Dios málacnunit pi naquincalakmáxtuyán caj cumu nacanajlayáhu xtamálacnún, y chátum chixcú xlakmáxtulh xlístacni caj cumu xmákan-táxtih xlímapeksín Dios, xlicana pi Dios xaaksaniná xquitáxtulh; pero huantú málacnunit caj chunatá

amán quincalakmáxtuyán cumu la timälacnúnilh Abraham.

¹⁹Bueno, éticu chinchú xpalacata Dios lìmacámilh xlimapeksín Moisés? Xlicana pi Dios macámilh xlimapeksín laquí nacamácatziniy pi xlíhuák cristianos tatlahuanít talàkhalhín y natapatinán, y huá xpalacata natalíkalhkalhitahuilay amá xlítalakapasni Abraham huantí nacalakmáxtuy chuná cumu la xmälacnúnicanit. Umá xlimapeksín Dios camáxquih ángeles laquí xlacán natamacamaxquiy Moisés, y cumu Moisés xakchuhuiná Dios xlítaxtuy nac xlacatíncán huá camáxquih cristianos. ²⁰Pero acxni Dios män mälaçnúnilh Abraham pi nalakmáxtuy, ni lacásquih para tícum namacán laquí chuná namacatzinján sinoque huá Dios män tachuhuínalh.

Xlimapeksín Moisés quincalenán nac xlacatín Cristo

²¹Xamaktum para tícum nalacpuhán, éntonces xlimapeksín Moisés caj talalacataquima huantí timälacnúnilh Dios Abraham? ¡Oh, nichuná xlá! Porque para huá amá xlimapeksín tlán xtalílaktáxtulh cristianos huantí xtamákantáxtih, entonces huák tlán xkalhíhu laktáxtut para huá xmákantaxtíhu huantí huan tamá límapeksín. ²²Pero nítí lay mákantaxtiy porque antiyá nac amá xtachuhuín Dios huantí tatzoktahuilanít nac likalh-tahuaka huan pi xlíhuák cristianos xtachín catlahuanít talàkhalhín, y huá xpalacata xmän huantí natalí-pahuán Cristo tlán natamaklhtinán amá laktáxtut huantí hasta

xamakán quilhtamacú xmälaçnúnít Dios namastay.

²³Lata xapulh quilhtamacú acxni niä xmin Cristo amá xlí-mapeksín Dios xlítaxtuy cumu la chatum quimaktakalhnacán huantí nakalhakaxmatáhu lìhuán kalhkalhitahuilayáhu amá huantí naquincalakmáxtuyán laquí huá chú nalipahuanáhu. ²⁴Umá líma-peksín xquincalímacuaniyán cumu la chatum puscát huantí camaktakalha lactzu camán laquí naquincamaktakalhlenán hasta antá nac xlacatín Cristo; y acxni chú nalipahuanáhu xlicana pi xlá tlán naquincalímaxtuyán cumu la xalaktaxtún cristianos huantí niaj takalhiy xtalàkhalhincán. ²⁵Cumu chú aya minít Cristo huantí lipahuanáhu niaj xlacasquinca pi amá límapeksín naquincamaktakalhán cumu la xlimaktakálhat y ankalhíná naquincahuaniyenán huantí luu quiltilahuatcán. ²⁶Porque xlíhuák aquinín huantí lipahuanáhu Cristo Jesús xlicana pi huák xcamanán Dios lìtaxtuyáhu y lakapasáhu xtala-capastacni. ²⁷Porque acxni huixinín taakmununitátit tatamacastucnitátit Cristo y ná xtachuná lìtaxtuyátit cumu la xlá. ²⁸Y Dios niaj huá cuentaj tlahuay para tícum judíos o tícum griegos, para tachín stacnit o calakuán lama, para chixcú o puscát; porque para xlíhuák tatamacastucnitátit Cristo Jesús entonces chatumá lìtaxtuyátit. ²⁹Y cumu xlicana huá tapeksiniyátit ná xlicana pi huixinín xlítalakapasni Abraham y huák pimpátit makamaklhtinanátit huantí Dios mälaçnúnít nacamaxquiy xlítalakapasni.

4 Huá ʉmá huant̄ luu ccā-huaniputunán pí xapūlh aquinín xtachuná xlitaxtuyáhu cumu la chatum actz̄u kahuasa huant̄ līmāxken tamakxteka y makxteknicán xherencia huant̄ namapeksiy, y masqui xlicāna pí luu huá mapeksiy juerza tlān litaxtuy cumu la chatum tasacua porque niłay lactlahuay amá tumiñ huant̄ makxteknicanit, ² porque tahuilánalh huant̄ xtlat caputzanit xlacata natamaktakalha y natamakastaca hasta acxn̄i nalakchán quilhtamacú lata namacamaxqui-kocán huant̄ mapeksiy chuná cumu la laclhcahuilinít xtlat. ³ Pus nāchuná chú aquinín xquincaquí-taxtuniyán xapūlh acxn̄i niā xmin Jesús, porque xlamānáhu cumu la lactzu camán huant̄ nīnaj tacatziy huant̄ xtalulóktat, y catuhuá huant̄ cristianos xtalismaninít xtatlahuay laqui natalakmāxtuy xlistacnicán xquincalilamán cumu la xtachín. ⁴ Pero acxn̄i takátzilh quilhtamacú lata Dios xlaclhcahuilinít pi naquincalakmāxtuyán xlá macámilh nac caquilhtamacú xka-huasa huant̄ lacáchilh nac xlatámat chatum puscat antá nac xpulatamāncán judíos huant̄ lihuana xtamākantaxtiy huant̄ līmāpeksinán xlīmāpeksín Moisés. ⁵ Huá chuná līlacáchilh laqui tlān naquincalakmāxtuyán xlīhuák aquinín huant̄ xlaktzaksamanáhu lihuana namākantaxtiyáhu xlīmāpeksín Moisés porque xquincalilamán cumu la chatum xtachín, y laqui chuná Dios tlān naquincamaklhtinanán cumu la xcamanán. ⁶ Y laqui lihuana natalulokáhu

pí Dios aya quincalimāxtuntúnítán cumu la xcamanán hasta quinca-macaminín xEspíritu xkahuasa nac quinacujcán, y ʉmá Espíritu quincamāxquiyán līcamama laqui nahuaniyáhu: “iPapá Dios, xlīcāna pí huix Quintlaticán!” ⁷ Huá xpālacata ccalihuaniyán, lanchú huixinín niaj mililatamatcán cumu la xtachín līmāpeksín xlacata juerza namākantaxtiyátit, sinoque lītanuyátit cumu la xcamanán Dios, y cumu xlīcāna pí huix xcamanán milicatzitcán pí nachán quilhtamacú acxn̄i huāk huant̄ Dios kalhiy nā hui-xinín natākalhiyátit.

**Pablo ní lacasquín pí huant̄
aya talipahuanit Jesús
nalītāxtuparay cumu la tachín**

⁸ Huixinín huant̄ ní judíos, xapūlh acxn̄i niā xlakapasátit Dios, caj luu xmānuá xmākantaxtiyátit nala-kachixcuhiyátit amākolh huantu huixinín xcalimacapinátit cumu la midioscán masqui xlicāna pí nițu xkasatcán. ⁹ Pero cumu lanchú aya lakapasnítátit Dios o tlān nahuanáhu pí huá Dios camāxquínítán talaca-pastaci laqui tlān nalakapasátit, čtúcu chīnchú xpālacata amaktum māxquiparayátit quilhtamacú nacamakatlajayán xtalacapastacnicán cristianos huant̄ calilayán cumu la xtachín xlacata lihuana nalaktzaksayátit namākantaxtiyátit? ¹⁰ Chuná ccahuaniyán porque huixinín nā aya tzucuyátit camacastalayátit amākolh judíos lata xlacán ankalhiná catuhuá tamāpaxcuajniy, o talimacán aktum lanca quilhtamacú chuná para aktum papá osuchí aktum cāta acxn̄i tacacn̄inaniy Dios laqui xlá mas

nacalakalhamán.¹¹ Caj xpamacata huantú tlahuayátit clacpuhuán pi niitu calimacuaninitán amá quintascújut huantú clímakapalanit nac milakstipancán.

¹²Natalán, aquit clacpuhuán pi chuná xlítaxtútít cumu la aquit, porque aquit clítaxtunít cumu la huixinín xapulh xlapanántit acxní amá xlímapeksincán judíos nia xcalíkalhiyán cumu la xtachín. Masqui xlícaná pi chuná cqui-lhuama, ni xlacata para huixinín quilamatlahuíhu huantu ni quiliatláhuat xuanít, sinoque chuná cuan porque necxnicú quilalakmáku. ¹³Cumu la catzijátit pi caj xpamacata pülastum tajátat huantú quinchípalh huá juerza clítamák-xtekli nac mincachiquín, y aquit na huacu amá quilhtamacú pulh ccalimäkalchuhuinín xtachuhuín Cristo huantú mastay laktáxtut. ¹⁴Y amá quintajátat huantú aquit xac-patíma chuná huixinín calitzaksán Dios nac milatamalcán para xlícaná lakalhamaninanátit; pero huixinín ni caj quilalakmakáhu sinoque lipaxíhu quilamakamaklhtináhu cumu la chatum ángel, o ilámpara huatiyá Cristo Jesús makamaklhtinántit lata quilataláhu! ¹⁵Pero clácu chú látit? ¿Nícu alh amá minta-paxuhuancán huantú xkalhiyátit? Porque aquit stalanca xaccatziy pi caj quimpalacata huixinín hasta xtitamastátit xlacata xciamaxtunicántit milakastapucán para chuná tlán xactilitatlántih amá quintajátat huantú xacpatíma. ¹⁶Pero lanchú máx luu snun ccamakasitzinitán caj xpamacata cumu ccalimäkalchuhuinín huantú xtalulóktat Dios.

¹⁷Tamakolh cristianos huanti camalakaspityahuamán xlícaná pi lanchú luu snun calakalhamanán laqui naquilalakmakanáhu aquinín, y huata huá luu nacalipahuanátit y tlán nacamaktayalipinátit. ¹⁸Xli-caná pi nac quilatamalcán luu tamaclacasquín pi nacqaklhuanáhu nacalakalhamanáhu xamakapitzín cristianos pero huantu akstíum y xlíankalhiná nacalakalhamanáhu, ni caj acxní aquit lacxtum ccatalamachán namasiuyátit pi paxquianátit. ¹⁹Koxutanín huixinín quincamanán, xlícaná pi aquit luu snun cpátiima tacatzanájuat caj mimpalacatacán, xtachuná cumu la catzanajuanán chatum puscat acxní ámaj malakatuncuhuinán; y aquit ankaliná chuná cpátimaj nahuán hasta acxní Cristo luu xlícaná lámaj nahuán nac milatamalcán y lihuana mäkantaxtipátit nahuán huantú lacasquín. ²⁰Hasta ucu xactayachá nac milakstipancán clacpuhuán laqui atzinú luu tancs xaccamäkalchuhuinín, pero cumu luu mákat, ni ccatziy lácu luu tataksátit.

Xamakán Abraham xcäkalhiy chatiy xlacpuscatnín

²¹Xlihuák huixinín huantí lihuana mäkantaxtiputunátit xlímapeksín Moisés laqui nalakmäxtuyátit milistacnicán, capoco niqá likalhahukayátit huantú tatzoktahuilanit nac amá libro antanícu tatäksa limapeksín? ²²Porque nac amá likalhahuka na lichuhuinán lácu xamakán quilitalakapasnicán Abraham xcäkalhiy chatiy xlakkahuasán: chatum xkahuasa huá tákálhílh amá puscat huantí xmäscujucán nac chiqui cumu

la tachín porque caj cstacanít y chatumlítum xkahuasa huá xlá xtzí huantí luu xpuscat Abraham y ni caj xtasacua.

²³Agar xuanicán amá caj xastastán squitihuíná, xlá kálhílh chatum cskata huantí mälakatuncúhuílh porque xakáltílh Abraham y tatalakxtúmílh, pero amá Sara huantí luu xpuscat Abraham mälakatuncúhuílh xka- huasa porque huá Dios xmalaçnúninit pi natakalhiy chatum xkahuasacán.

²⁴Xlihuák umá huantú tikantaxtunít huintú quincalimásiyuniputunán Dios porque umäkolh chatiy lacchaján talitaxtuy cumu la pulactiy tala- caxlán: pulactum huá litaxtuy amá talacaxlán huantú mastácalh nac amá lanca kestín xalac Sinaí huam- putún pi huá Agar, xlihuák huantí antá tamaktepeksiy nac umá tala- caxlán tlán tamalacastucáhu cumu la xcamanán amá xastastán puscat huantí na xatachín talacachín cumu la xticicán.

²⁵Xlicana pi Agar litaxtuy amá kestín huanicán Sinaí nac Arabia, y tlán catamalacastucáhu cumu la ti lanchú tamaktepeksiy nac Jerusalén porque xlacán talitamakxteka xtachín cacatláhualh amá límapeksín huantú mastácalh nac Sinaí.

²⁶Y Sara huantí luu xpuscat Abraham huantí niți xmäscuyjuy cumu la xtachín, huá tlán tamalacastucáhu amá tunu xasasti Jerusalén xalac akapún, y aquinín huantí antá maktapeksiyáhu litax- tuyáhu cumu la xcamanán porque caj quintapaxuhuancán tlahuayáhu xtalacasquín Dios y ni cumu la tachín.

²⁷Porque nac xtachuhuín Dios lacatum chiné huan:

Capaxuhua huix puscat
huantí necxnicú kalhíñita
mincamán;

hasta cacatasa caj lata min- tapaxuhuán huix huantí niā maklhcatziya amá tacatzaná- juat lata namälakatuncuhuiya miskata.

Porque amá puscat huantí aya xlakmakancanít caj xpalacata cumu niłay xkalhiy xcamán, huata atzinú lhuhua ámaj cakalhiy xcamanán nixachuná huantí xtatalakxtu- minít xtäkolú.

²⁸Natalán, aquit clacasquín nacatziyátit pi huixinín huak xcamanán Dios xtachuná cumu la timälac- núnilh xamakán quilhtamacú Abraham pi xámaj kalhiy chatum xkahuasa xuanicán Isaac.

²⁹Na xtachuná cumu la amá xamakán quilhtamacú amá kahuasa huantí xlacachinít porque huá Abraham chu Agar xtatalakxtuminít ni xuc- xilhpútun amá kahuasa huantí xlacachinít caj xpalacata cumu xEspíritu Dios mäkantáxtílh nac xlatámat Sara huantú xmalaçnúnit, lanchú nachuná aquinín quin- caquitaxtunimán.

³⁰Pero étícu huánihl Dios Abraham? Pus nac líkalhtahuaka tatzoktahuilanít pi chiné huánihl: “Catlakaxtu tamá mintasacua puscat huanicán Agar chu xkahuasa nac míñchic porque ni mininiy xkahuasa natamak- lhtinán huantú huix namakxtekiya xkahuasa huantí luu mimpuscat Sara huantí ni caj mintasacua.”

³¹Natalán, huá xpalacata ccälihuaniyán pi aquinín ni litaxtuyáhu cumu la xcamanán amá puscat huantí tasacua xuanít sinoque huá litaxtuyáhu cumu la xcamanán amá huantí ni tasacua puscat.

Cristo quincalakmáxtún nac xliłihueke amá huantú cumu la xtachín xquincakalhiyán

5 Xlicana pi Cristo quincalakmáxtún laquí amá xlimapeksín Moisés niaj naquin-calilayán cumu la xtachín xlacata juerza namákantaxtiyáhu huàk huantú limapeksinán. Huá xpalacata ccalihuaniyán pi akstítum calatapátit, chunatiyá calipahuántit, y niaj tu xtachín ticatlahuayán atunuј limapeksín.

²Cakaxpáttit y caakatákstít huantú camán cahuaniyán. Para tícu la huixinín huanti aya lipahuanitátit Cristo y xamaktum chú nalacpuhuán pi luu xlacasquinca nacircuncidarlay laquí tlàn nalaktaxtuy, xlicana quitaxtuy pi nítu limacuaniy mäsqui calipáhualh Cristo. ³Aquit ccahuaniputumparayán pi xlihuak o catihuá chixcú huantí lacasquín cacircuncidartlahuácalh caj cumu chuná huan xlimapeksín Moisés pi xliłáhuat, pus ná lacatanes cacátzilh pi para chuná luu tlahuaputún ná luu xafuerza lìhuaná xlimakantáxtit nahuán xlihuak atipatu huantú limapeksinán xliłáhuat. ⁴Xlihuak huixinín huantí lacputzapátit pi niaj tu nakalhiyátit mintalakalhincán caj xpalacata namákantaxtiyátit huantú huan nac xlimapeksín Moisés xlicana pi talakamakatljinipátit Cristo y lata lácua calakalhamanán Dios. ⁵Pero aquinín níchuná canajlayáhu porque xEspíritu Dios quincamak-tayayán akstítum nacanajlayáhu huantú Dios quincamálaçnuniyán

xlacata pi naquincalimáxtuyán cumu lámpara niaj tu kalhiyáhu quintalakalhíncán caj xpalacata cumu lipahuanáhu. ⁶Porque para aquinín xlicana huá tatalacastuc-nítahu Cristo nítu limacuán para circuncidarlanítahu osuchí nítu circuncidarlanítahu, caj xmanhuá limacuán nalipahuanáhu, y umá quintacanajlaticán akstítum nalila-tamayáhu nac quintapaxquitcán.

⁷Xlicana pi aya akstítumá hui-xinín xlapátit, ¿tícu cahuanín y calactlahuayahuán xlacata pi niaj calipahuántit xtalulóktat Dios?

⁸Xlicana pi ní huá Dios calactlahuayahuán, porque xlá luu man calacsacnítán laquí nalipahuanátit Cristo. ⁹Cumu la huixinín catziyátit pi masqui caj actzú levadura maxcutíkoy xlihuak huantú lak-munucanít harina, pus luu cuentaj catlahuátit nítu huàk tilaclata-yátit. ¹⁰Pero aquit tancs ccatziy pi Quimpuchinacán nacamak-tayayán xlacata ní caj lihuaca nalilaclata-yátit huantú ccahuanimán, y huá Dios catziy lácu ámaj mapatiniy latachá tícuya cristiano huantí caj akatiyuj catlahuamán.

¹¹Natalán, para aquit xactzúculh liakchuhuinán pi xlihuak huantí lipahuaná Cristo catacircuncidárlalh, amakolh judíos niaj xquintasitzínih y niaj calahuá huantú xquintaliyáhualh. Porque lata Cristo nínit nac cruz niaj xtalitaaklhíhuilh mäsqui cristianos catalipáhualh para ná acxtum xtacircuncidárlalh, porque xlacán talacpuhuán pi chuná talacasquín natlahuayáhu laquí tlàn nalaktaxtuyáhu. ¹²Pero xlihuak tamakolh huantí akatiyuj

catlahuamán cāminīniy pí maktum xcachucuctinikócalh huantú taka-lhiy laquí xtalicázilh.

¹³Dios calacsacnítán huixinín natalán laquí nacalakmáxtuyán nac xlacatín huantú xcalilamán cumu la xtachín, pero xlá ni huá chuná calitlahuán caj xpápacata nalatapayátit o natluahuayátit lata túcu huixinín nalacpuhuanátit, sinoque xlá lacasquín pí acxtum nalapaxquiyátit y nalāmaktaya-yátit. ¹⁴Porque xlíhuák huantú huan nac límapeksín caj xman huá eé kampatúm litaxtuy: “Cacala-kalhámanti mintacristianos cumu la mēstu lakalhamancana.” ¹⁵Xli-cana pí luu cuentaj catlahuátit lácu nalatapayátit porque para caj xman nalāmakasitzáihuila-yátit y nalālacaxcatahuilayátit ni makás quilhtamacú mēstucán nalālactlahuayátit.

**Akstítum calatamáhu chuná
cumu la quincamalacpuhuaniyán
Espíritu Santo**

¹⁶Huá xpápacata aquit ccalihua-niyán, akstítum calatapátit chuná cumu la cāmalacpuhuaniyán Espíri-tu Santo, y ni huá cakalhakaxpáttit huantú cāmatlahuiputunán xalixcánit mintalacapastacnicán.

¹⁷Porque xlíhuák huantú kalhiyáhu xalixcánit quintalacapastacnicán ni matlantiy huantú quincamatl-huiyán Espíritu Santo, y na chuná Espíritu ni matlantiy huantú quincamatlhuuiyán xalixcánit quintalacapastacnicán; huá xpápacata huixinín ni ljhuaná catziyátit xatúcu luu namākantaxtiyátit porque acxtum quincamascujupu-

tunán la pulactu cumu la pulactu.

¹⁸Pero cumu para huá Espíri-tu capulalemán entonces niaj lay para túcu xtachín caticatla-huán, nipara amá xli-mapeksín Moisés, na nipara amá xalixcánit mintalacapastacnicán.

¹⁹Porque ni luu mákat tuncán tasiyyu huantí takalhakaxmat-mánlah huantú cāmalacnúniy xalixcánit xtalacapastacnicán: taxakatliy atunuj puscat masqui tahuilánalh xpuscatcán, catuhuá huantú talimakapaxuhuay xmac-nicán, y lhuhua huantú lixcájnít tatluahuay, ²⁰talakachixcuhiy tzincun, talascuhuay. Marí taquic-lhcatzaniy xtacristianoscán, ni talauçxilhputún; catuhuá talā-limakasitziy, talālacataquiy, y tamapajpitziy cristianos laka-putiyú tatluahuay. ²¹Catuhuá talakcatzalacaníy huantú takalhij xāmakapitzín, lanca xakotní y lhuhua huantú lixcájnít tatluahuay. Aquit aya maklhuhuatá chuná cca-limakalchuhuinítán pi xlíhuák huantí chuná mākantaxtiyáma eé lixcájnít latámat tancs cacázilh pi ni catitáchálh nac xpaxtún Dios.

²²Pero xlíhuák huantú limascu-junún Espíritu Santo xlá mastay tapaxquit, tapaxuhuán, tacácsuat, ni pála tasitziy para túcu cahua-nicán, tlān xtapuhuancán, y tancs tamākantaxtiy huantú talitayay.

²³Ni talacataqujnán, y ni talacpu-huán para túcu aya páraj xtalánih. Xlihuák umá huantú matlahuijnán Espíritu ni tū limapeksín huantú naliuhuán pi ntlán tascújut. ²⁴Y xlíhuák amākohl cristianos huantí aya tatapeksiníy Cristo quitaxtuy

pi aya tatatapekextokotahuacanit xlíhuak xalixcánjnit xtalacapastacnicán huantú xcámatlahuij líxcájnit talakalhín.²⁵ Cumu lanchú tlán lamáñáhu huá chuná lílay porque huá Espíritu quincapulalemán, pus camaxquíhu quilhtamacú pi huá tamá Espíritu ankalhíná caquincamaktayán.

²⁶Ní caj calalacataquíhu, na nipara calacputzáhu lácu nata-huilay tasitzi, o nacalakcatzaniyáhu huantú takalhiy xamakapitzín cristianos nac quilakstipancán.

Xlíhuak huantí lipahuanáhu Cristo ankalhíná calamaktayaléhu

6 Natalán, para xamaktum nacatziyátit pi huí chatum cristiano huantí lítamókosli aktum talakalhín, y cumu huixinín huá tlahuapítit huantú calímapeksiján Espíritu Santo, pus camaktayátit laquí natatancesparay nac xlatámat. Pero acxni para tícu namakta-yayátit huantú ya tapaxuhuán camaktayátit, y calakalhamántit chicá para xamaktum ná nacatzaksacanátit y nalaclatayayátit nac mintacanajlatcán.

² Acxtum calamaktayalipítit para tícu calakchinán taaklhúhuit, para chuná natluahuayátit entonces tancs mákantaxtipátit nahuán huantú límapeksinanit Cristo. ³Pero para tícu caj lacataquínán ni lay camaktayay xamakapitzín porque lacpuhuán pi luu talipáhu, xlicána quitaxtuy pi niitu xkásat y caj sacstu taakskahuitamáma. ⁴Lata chatunu cristiano mán líhuana caúcixhilí para tlán osu nitlán huantú tlahuama, y ni catamálaçástucli huantú

atlahuamánalh xamakapitzín. Para naucxilha pi tlán huantú tlahuama sacstu mán catziy para tlán nalipaxuhuay xtascújut. ⁵Porque tancs ccáhuaniyán pi chatunu chatunu nalichán xtacuca huantú uú macaxnit.

⁶Para huixinín huí chatum nac milakstipancán huantí calímapalchuhuiniyán xtachu-huín Dios xlicána pi tamá luu mininíy namaxquiyyátit huantú namaclacasquintilhay.

⁷Para huí chatum tícu lacpu-huán pi tlán nalikamánán Dios nac xlatámat y ni naxokonún, niij cataakskahuitámalh porque milicatzicán pi huantú chatunu chantilhama nac xlatámat huak naquimakalay acalistán. ⁸Amá cristiano huantí caj xmanhuá tlahuama huantú límapaxuhuay xlatámat xtachuná quitaxtuy cumu la a cachanchá huantú nitlán lichánat y xlíhuak huantú namakalay xlí-cána pi caj nalilaktzankatayay. Pero huantí tlahuay huantú límapeksiján Espíritu xtachuná cumu la a cachanchá huantú tlán lichánat y huantú namakalay canecxnicahuá namaxquiyy latámat huantú ni lak-sputa. ⁹Pus necxnicú calítlakuáhu xlacata natluahuayáhu huantú tlán y akstítum tascújut, cumu para necxnicú nataxlajuaníyáhu chuná nalatamayáhu namín quilhtamacú acxni naucxilháhu huantú aya lis-cujnitáhu nahuán. ¹⁰Pus latachá níncocxni quilhtamacú ankalhíná huantú tlán cacaliscujui latachá tíuya cristianos pero xalihuaca amäkolh huantí ná acxtum quinca-talipáhuanán Cristo.

Pablo cahuaniy tachalí cristianos

¹¹ iChú caucxílhit lata xlilanca quiletra huantú man ccamacanítzoknimán xlacata naccáhuaniyán aktum tachuhín! ¹² Tamäkolh huantí calimakalchuhuiñimán pi luu xlacasquinca nacircuncidarlayátit, xlacán chuná tatlahuamánalh porque huá taputzamánalh lácu lacuán cristianos natalítaxtuy nac xlakstipancán amäkolh judíos huantí tacanajlay pi xlacasquinca lihuana namakantaxtiyáhu huak huantú huán xlímapeksín Moisés y huá talisitziniy taliputzastalay xlíhuak huantí tacanajlay pi xman huá Jesús mästay laktáxtut. ¹³ Pero caj caucxílhit pi lata xlíhuak amäkolh huantí talilacataquinán pi tacircuncidarlanit nipara chatum huantí xlícaná lihuana makantaxtiyána nac xlatámat xlíhuak huantú limapeksinán xlímapeksín Moisés. Pero mäsquí xlacán stalanca tacatziy pi chuná huata luu juerza talacasquín pi huixinín cacircuncidarlátit laqui natalilacataquinán acxní tahuán pi camaqatäksnín huantú tamasiyumánalh. ¹⁴ Pero huantú aquit quilacata, nipara püllactum atunu huantú clipaxuhuay o huantú clilacataquinán

sinoque caj xmänhuá xcruz Quimpuchinacán Jesús, porque caj xpalacata cumu aquit huá clipahuán Cristo, umá caquilhtamacú clímaxtuy cumu lámpara ninjt huantú quilacata, y nachuná tamá caquilhtamacú aquit clítaxtuy pi aya cnininjt. ¹⁵ Huá xpalacata ccalíhuaniyán pi niyu límacuán para circuncidarlanita o niyu circuncidarlanita, huata caj xman huá límacuán namaluloka pi xlícaná Dios mästajnt milatámat. ¹⁶ Dios cacamaxquín lanca tapaxuhuán chu snun cacalakalhamán xlíhuak huixinín huantí mäsiyuyátit nac milatamatcán pi chuná akstítm lapátit, xahua xlíhuak amäkolh cristianos canihuá xalanín huantí calacsacnít laqui ná xcamanán nacalímaxtuy cumu lā huixinín.

¹⁷ Ahuatiyá ccahuaniputunán pi niyaj clacasquín para tícu naquilacputzani paray huantú naclitasitziniy. Chuná ccahuaniyán porque xlíhuak umá xamacxtutuhua quimacni huantú lhühuatá clipatinjt huantú quintlahuanicanittá, stalanca lítasiyuy pi xlícaná aquit xlacscujni Jesús.

¹⁸ Natalán, clilacasquín pi Dios lan cacasiculanatlahuán xlíhuak huixinín. Chuná calalh, amén.